

Khamis – 27 Ogos 2020

Halaman : 17



JULI (tiga dari kanan) bergambar bersama kakitangan Jakoa Kelantan di Dewan Komuniti Kesedaran semalam.

Jakoa rangka langkah tangani kemiskinan

GUA MUSANG – Jabatan Kemajuan Orang Asli (Jakoa) sedang merangka langkah terbaik bagi menangani masalah kemiskinan yang masih membelenggu 198,000 masyarakat Orang Asli yang tinggal di 856 buah kampung seluruh negara.

Ketua Pengarah Jabatan Kemajuan Orang Asli (Jakoa), Professor Dr. Juli Edo berkata, sehubungan dengan itu, pihaknya juga sedang menyusun program yang lebih berkesan untuk masyarakat Orang Asli keluar daripada garis kemiskinan.

Katanya, Orang Asli masih tidak keluar daripada garis kemiskinan dan kadar pendapatan B40 juga semakin meningkat.

"Kita kena mencari pendek-

tan baharu untuk mempelbagaikan kegiatan ekonomi Orang Asli supaya tidak bergantung kepada tanaman tunggal sahaja untuk membiayai sara hidup keluarga mereka.

"Kita juga akan latih masyarakat Orang Asli ke arah hidup lebih berdikari dan tidak mengharapkan bantuan berterusan," katanya selepas menghadiri Majlis Anugerah Perkhidmatan Cemerlang Jakoa di Dewan Komuniti Kesedaran di sini semalam.

Turut hadir Pengarah Jakoa Kelantan dan Terengganu, Shafie Abas.

Mengulas lanjut mengenai usaha untuk meningkatkan taraf hidup Orang Asli, beliau berkata, Jakoa sentiasa mengadakan

program untuk meningkatkan ekonomi mereka.

Bagaimanapun katanya, program itu perlu dinilai semula dengan menggunakan model baharu kerana keberkesanannya kurang dalam meningkatkan pendapatan Orang Asli.

Dalam perkembangan lain, Juli berkata, Jakoa juga akan memperuntukkan RM200 juta bagi menaik taraf jalan perhubungan Orang Asli di kawasan pedalaman Gua Musang.

"Pembangunan prasarana jalan akan dilakukan secara berperingkat.

"Kita telah membaiki jalan di beberapa kawasan kritis yang bermasalah ketika hujan lebat baru-baru ini," katanya.